



15. august 2019

UKA2019/99

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara.

**Isumaqatigiinniareernikkut isumaqatigiissusiorani imaluunniit periutsit taakku marluk ataatsimoortillugit ilaasunik angallaasinermut sullinnissamut isumaqatigiissutit ataanni angallassinermi suliassat pillugit isumaqatigiissusiornermut tunngavissaqalernissamut suliarinnittussarsiortarneq pillugu inatsisip atorneqarata iluaqutaanik ajoqutaanillu takutitsisumik Naalakkersuisut UKA2020 nallertinnagu nassuiaasiornissaamik peqquneqarnissaannik Inatsisartut aalajangiiffigisassaattut siunnersuut. Nalunaarusiaq siunissami sullissinermut isumaqatigiissutinut tunngatillugu inassuteqaatinik imaqartariaqarpoq.**

(Inatsisartunut ilaasorta q Tillie Martinussen, Suleqatigiissitsisut)

#### **Tunngavilersuut:**

Nunami inunnik ilinniarsimasunik ikitsunik isumalluuteqarfiusumi pisortallu amerlasoorpassuarnik suliffissaqartitsivigisaanni pisortat ataanni immikkoortuni ataatsimut isigalugit isumalluutit ingerlatsiviillu pisariitsumik sunniuteqarluartumillu atorneqarnissaat qulakkeertariaqarparput.

Ilaasunik angallassinermut sullinnissamut isumaqatigiissutit pillugit Inatsisartuni Naalakkersuisunilu isumaqarajuttarpugut taakkunani piissutsit tamaasa tamakkiisumik nakkutigisariaqarigut, taamaammallu isumaqarluta immikkoortut tamaasa qulakkeernerisigut aqqutillu tamarluinnarmik suliffeqarfinit pisortat pigisaannik tamakkiisumik ilaannakortumilluunniit ingerlanneqartiaqartut. Suleqatigiissutsisuni isumaqarpugut eqqarsartariaaseq tamanna pisoqalnikuusoq, kissaatigaarpullu immikkoortut, aqqutit sullissinerillu suut namminersortunit ingerlanneqartilersinnaanerigut sukumiisumik misissueqqissaartoqartariaqartoq.

kingullertigut Qeqertarsuup Tunuani Kujataanilu takuniuuarput namminersorlutik inuussutissarsiortut ilaasut aqqutiminnut apuukkajuttaraat, tassani sullissinissamik isumaqatigiissutinik pissarsisut taamaatiinnartariaqartarlutik.

Taamaalilluni ilaasunik angallassinermi periutsit aallaqqaataanit eqqarsaatigeqqinnissaat tunngavissaqarsorinarpoq. Tamassuma inuiaqatigiinnut iluaqutaanissaa paasinarsinnaassagunarpoq namminersorlutillu inuussutissarsiortut periuseq pillugu eqqarsaqqisinnaallutik, pisortat taamaalillutik aqqissuussaaneq atugarput pitsaanerpaajunngitsuuppat pisortat sullississutinik namminersorlutik inuussutissarsiortunit pisisinnaallutik.

Sullissineq pillugu isumaqatigiissutinik pisisariaaserput allangortinneqarsinnaanersoq aqqutillu ilaanni tamaniluunniit ingerlatsisunut assigiinngitsunut arlalinnut aningaasatigut iluaqutaalersinnaanersoq sukumiisumik misissuilluarnermik tunngaveqartariaqarpoq.

Nunami ilaasunik ingerlatsinermi aqqutitta taamatut annertutigisumi ajornakusoortigisumilu kiisalu isorartutigisumi ilaasorpasuaqarfiusumilu sullississutit neqeroorutitta pitsanngorsarsinnaarigut piffissallu ingerlanerani allangortitsinnaanersugut namminersortunullu suliaakkiissutigisinnaanerigut

UKA2019/99

J. nr. XX.XX.XX /18EM-LABU-XXXXX

sillimaffiguartariaqarpagut.

Takornariaqarneq ukiuni makkunani isiginiarneqarpoq, tamassumalu kinguneraa takornariartitsinermik suliaqartut ajornartorsiulertornerat pitsaassuseqartunillu sullissinissamik pisariaqartitsineq annertusiartorluni. Aamma takornariartitsisarnerup nunatta annertunersaanut siaruarneqarsinnaanera taamatulli pingaaruteqartigaaq.

Tamanna nunatsinni ilaasunik angallassisarnermut nutaanik piumasaqaateqartitsilerpoq, pisortallu nunatsinni taamatut annertutigisumik assigiimmik pisussaaffeqartumik, imminnut atasunik aqquteqarnermut akiliisarpata namminersorlutik inuussutissasiuteqarnermi periarfissanik nutaanik ujartuinissaq qanissorinarpoq.

Tamassumani angallatilinnik inuussutissarsiortorpassuaqarpoq nunatsinni ilaasunik angallassinermi aqqutinut iluaqutaasumik saniatigut isertiaqarluarsinnaasunik.

Tamanna sukumiisumik misissuilluarnermik tunngaveqartariaqarpoq, taamaammat taamatut siunnersuuteqarpugut..

**Pisortanut aningaasatigut allaffissornikkullu kingunissai:**

Ilimagineqarpoq taamatut nassuiaasiornermi ukiumut suliffissat marluk tamarmik immikkut A/C fuldmægtigit atorfeqarfigisaat qaangissanngikkai. Tassa kr. 500.000 marloriarlugit.

**Namminersortunut aningaasatigut allaffissornikkullu kingunissai**

Soqanngilaq.

**Innuttaasunut aningaasaqarnikkut allaffissornikkullu kingunissai:**

Soqanngilaq.